



GALIZA

**Un pòble dab ua istòria
de luta tà un futur
de libertat**

► Vista panoràmica de la plaça de la Quintana lo 25 de julhet de 1995.

La nacion galiciana

Situada a l'extrème nòrd-oèst de la costèra atlantica de la península iberica, Galícia qu'ei oficiaument reconeishuda com nacion desempuìsh 1933 peu 9au Congrès de las nacionalitats europèas, restacat a la Societat de las Nacions. Galícia que presenta totas las caracteristicas objectivas que la constitueishen com nacion. Açò qu'ei demostrat per la istòria nosta –amagada e deformada– marcada per lutas constantes tà la reconeishença deu noste dret a estar libres com pòble.

Lo reiaume de Galícia qu'estó lo prumèr a establís en Euròpa, abans quitament la caduda de l'imperi roman, gaudint d'ua vita independenta e d'ua immensa portada politica e culturau capvath la península au long de l'Atge Mitjan. Qu'ei en l'anciana província romana de Gallaecia qu'apareishó au sègle VIIIau la lenga qu'en Galícia e aperam lo galician e coneishuda internacionaument dab lo nom de portugués.

Qu'ei a comptar deu sègle XVau que Portugal se consolidè com reiaume independent e que Galícia estó somesa a la dominacion de Castilha, puish a la d'Espanha, dinc a uei, on los drets de las nacions au bèth miei de l'Estat espanhòu e contunhan d'estar escarnits.

Galícia qu'a estat tostemp ua nacion dispausant d'importantas ressorças economicas. Lo neurisatge e l'agricultura que jògan un ròtle important e que fòrman un deus pielars fundamentaus de la nosta economia. Qu'èm la prumera potència d'Espanha en matèria de produccion leitèra e en resèrvas horastèras.

La longa tradicion maritima de Galícia qu'a hèit d'èra ua potència de pesca e de cultura de fruts de la mar, dab ua de las flòtas mei granas d'Euròpa. La nosta energia electrica qu'a istoricament servit tà industrializar d'autas zònas de l'Estat, com Madrid (qui ne'n produiseish pas): qu'exportam 40 % de l'energia que produisim, en bèth subir las consequéncias sociaus e environamentaus.

Totun, tota aquesta energia e aqueste potenciau productiu n'an pas miat a la creacion d'un teishut industriau e economic au servici de Galícia. La dependéncia politica e la manca de capacitat deu govèrn qu'an creat un sosdesvolopament economic, en transformar un país ric en ressorças en un país empraubit.

Mes aqueste processus de colonizacion e d'assimilacion n'a pas amortit lo desir de sobiranitat de Galícia. Lo pòble galician qu'a conservat la soa lenga e desempuìsh lo siègle XIXau que s'ei organizat a truvèrs lo movement de liberacion nacionau incarnat peu nacionalisme galician.



► Cant de l'imne nacional de Galícia a la Plaça de la Quintana
lo 25 de juliuet de 2005.

Lo nacionalisme galician qu'ei la responsa democratica deu nòste pòble tad ua situacion de dependéncia economica, d'opression culturau e politica de Galícia qui empacha lo progrès e lo benestar deu pòble galician.

Çò qu'ei lo nacionalisme galician?

Desempuïsh las annadas 1990, aquesta responsa que s'ei articulada autorn de fòrças patrioticas qui s'inspiravan de las iniciadas per las Fraternités de la lenga e lo Partit Galician.

Galícia qu'ei la protagonista d'ua longa istòria de lutas sociaus, obrèras e paisanas: contra l'agression deu noste environament naturau e lo pilhatge de las nostas ressorças; a la defensa de la lenga nosta e cultura nostas; e en favor de las libertats democraticas e deus drets nacionaus.

Lo nacionalisme galician que serveish atau de fòrça motora dens los movements sociaus. De l'environamentalisme au feminisme, en passar

peu movement LGBT, lo movement estudiant, la defensa deus drets linguistics e lo monde deu tribalh, enter autes, lo nacionalisme galician qu'ei present en tots aquestes maines.

Lo principe d'auto-organizacion deu pòble galician, mencionat dessus, que's concretiza suu plan politic a través lo Blòc Nacionalista Galician (BNG), e suu plan deus drets de la classa obrèra a través la Confederacion Intersindicau Galiciana (CIG), principau sindicat deu país. De mei, qu'existèish un movement associatiu de basa hèra larg en maines com la defensa de la cultura e de la lenga.



► Imatge iconica utilizada en mantua publicacion deu nacionalisme galician presa a la hèsta Nacionau de Galicia de 1994.

Çò qu'ei lo Blòc Nacionalista Galician?

Lo Blòc Nacionalista Galician (BNG) qu'estó fondat en 1982 com Front Patriotic, en marcar la culminacion deu processus de restructuracion deu nacionalisme galician. Desempuish 1990, que dispausa de la soa pròpia organizacion de la joenessa: Galiza Nova.

Lo BNG qu'ei ua organizacion nacionalista qui defene la soberania nacionau e l'emancipacion social de la nacion galiciana tà que vadi un Estat sobiran, democratic, laic e republican: la Republica de Galícia.

Uei, lo BNG que gaudeish d'ua ampla basa social e d'ua importanta preséncia institucionau mercés aus sons conselhers e conselheras municipaus e sons màgers dens tot lo país. Qu'ei egaument present au Parlament de Galícia, on detien nombrós siètis, atau com aus parlaments espanhòu e europèu.

En 1999, lo BNG que crea la Fondacion Galiza Sempre, qui's centra sus duas linhas d'accion

prioritàrias: la promocion de la pensada socio-economica, politica e culturau galiciana, e la preservacion e la difusion de la memòria istorica de Galícia, e mei que mei deu nacionalisme galician.

En la recèrca d'ua navèra cultura politica basada sus la diversitat, la Fondacion qu'esten lo son camp d'accion enlà de Galícia a truvèrs las relacions que mantien dab autas entitats de l'esquèrra soberanista en tota l'Espanha mercés au Fòrum Soberanista e a la Fondacion Coppieters, qui amassa entitats engatjadas en la defensa de l'Euròpa deus pòbles e deu dret a l'autodeterminacion.



► Moment d'un deus vótes a l'amassada fundadora deu BNG debanada en la vila de A Coruña en 1982. Fôto Xan Carballa.

Lo BNG qu'ei ua fòrça patriotica e internacionalista qui defen lo dret de tots los pòbles deu monde a estar libres e a decidir de biaish sobiran e manifèste la lor sancèra solidaritat dab totas las nacions qui lutan tà la libertat.

Lo BNG, ua fòrça internacionalista e anti-imperialista

Que s'ageish d'ua fòrça anti-imperialista, puishque rejeta la dominacion de cèrtas nacions sus autas, luta contra totas las fòrmas d'opression, s'opausa a tota fòrma d'ingeréncia imperialista o d'intervencion politica o militar e preconiza relacions internacionaus basadas sus la cooperacion.

Que considèra la defensa de la patz mondiau, lo desarmament e la dissolucion deus blòcs mili-

tars agressius com ua prioritat e que preconiza la resolucion pacifica e democratica deus conflictes internacionaus.

De mei, la defensa deus drets umans e la luta activa contra tots los tipas de discriminacion per quina rason que sia –origina o etnia, lenga, religion, orientacion o identitat de genre, eca.– que son tanben valors essenciaus deu BNG.